

# 太上寶筏圖說

孝 悌 篇

上海經書流通處印  
各省世界書局發行

順治十二年世祖章皇帝御製勸善要言序

朕惟天道至善卽以其善賦之下民故人之生無有不善其或有不善者皆因內蔽於私穢外染於汚習至不能守其初心遂悖乎天矣因人之存心行事不同是以上天鑒察降以災祥其降祥者固以顯佑善人其不得已而降災者亦以明戒下民使之改過而遷於善也從來報應昭昭不爽朕不可畏哉古人原天垂訓以教天下正論嘉言不一而足但文之深者或不易通言之簡者又不能盡朕恭承天命撫育萬方深念上之教世勸勉爲先人之立身爲善最樂故取諸書之要者輯爲一編名曰勸善要言語不欲文期於明理詞不厭詳期於曉衆欲使賢愚同喻大小共知讀此書者當深思其義體之於身省之於心善者則益當加勉而進於淳良以求吉慶其或無知而誤染於不善者尤當速改而歸於無過以免災戾庶不負上天好生之心而朕殷殷教化之意亦不虛矣凡我人民其敬勉之哉

雍正八年十二月二十六日世宗憲皇帝上諭

民間借貸一事所以通彼此之有無濟一時之緩急意本善也乃有貪利營私之徒往往乘人匱乏勒索重利如借貸米穀則不但加三倍起息竟有加五或多則加倍者小民偶爾窘迫止顧目前及禾稼登場終歲辛苦之所獲不能復爲己有雖豐穰之歲僅足供償債之需一遇歉收之年則束手無策必

至息上加息累年不能楚結且貽累於子孫而挾實射利乘急多取者視爲固然全無矜憐憫之意貪鬻爲性澆薄成風此亦人心世道之患也夫緩急人所時有周禮三物六行孝友睦嫻而繼以任恤蓋州里族黨有急則相倚任有困則相賑恤此鄉鄰風俗之美王化所先而其人仁厚居心亦所以長享福澤於弗替此卽仰邀天地神明賜佑休徵之本也從來窮通貧富境遇不常幸而富厚有餘是天之待我獨厚則當思濟人利物恤災扶困以廣行善事仰答天恩若以天之厚我者持以爲剝削貧人之具不但上天鑒臨必加譴責卽返之於心亦忍爲之乎凡屬貪鄙之人利令智昏以爲如此可以致富獨不思貧富有一定之數善惡有不爽之報假令爲富不仁者皆得擁厚貲以長子孫則樂善好施者必至匱乏終身矣自古迄今有此天理乎嘗見不義之財得之若易乃享受未久或耗於意外之災患或敗於不肖之後人是知刻薄之行損人適以自損仁厚之風利人還以自利也此種盤算薄惡之俗若不曉諭化導遽以官法繩之又恐轉阻貧民借貸之路故特將天道循環之理委曲開導啓其良心挽其敝俗凡有借貸銀錢米穀者二三分起息尙屬情理可行若太多則誠爲富不仁矣着地方有司將天理人心時時訓諭倘勸導既久而尙有重利盤放者則訪確一二人加以懲治以儆其餘如此庶惡習可以轉移貪風可以止息矣如有無賴棍徒因朕此次勸導之訓諭或借端圖賴或生事強借

以擾害良善溫飽之家者尤當加以重懲不可寬貸此全賴地方有司奉行勸導之公當勸誠也

### 乾隆五年十一月初四日上諭

從來爲治之道不外教養兩端然衣食足而禮義興故論治者往往先養後教朕御極以來日爲斯民籌衣食之源水旱之備所期溥海烝民蓋藏充裕俯仰有資以爲施教之地而解慍阜財之效尙未克副朕懷第思維皇降衷有物有則衣食以養其形教化以復其性二者相成而不相妨不容偏廢正如爲學之道知先行然後知行並進非翻然兩時判然兩事又安得謂養之道未裕遂可置教化爲緩圖也今學校遍天下山陬海澨之人無不挾詩書而遊庠序願學徒以文藝戈科名官司以課試爲職業於學間根本切實用功所在概未暇及司牧者盡心於簿書筐篋或進諸生而講文藝則以爲作養人材振興文教其於閭閻小民則謂是蚩蚩者不足與興教化平時不加訓迪及陷於罪則執法以繩之無怪乎習俗之不淳而詬誶澆漓之不能禁止也朱子云聖人教人大概只說孝弟忠信日用常行底話人能就上面做將去則心之放者自收性之昏者自著此言深探立教之本原至爲切實蓋心性雖民之秉彝而心爲物誘則放性爲欲累則昏存心養性非知道者不足與幾矣夫事親從兄則家庭日用人人共由孩提知愛少長知敬又人人共具不待勉強爲之堯舜之道不外乎是卽如得一食必先

以食父母得一衣必先以衣父母卽是孝能推是心而凡所以順其親者無不至卽爲孝子父之齒隨行兄之齒雁行此卽是悌能推是心而凡所以敬其兄者無不至卽爲悌弟一人如此人人從而效焉一家如此一鄉從而效焉則爲善俗孟子曰人倫明於上小民親於下又曰人人親其親長其長而天下平由是道也惟在上者不爲之提撕警覺則習而不察而一時之明不勝夫積習之漸染童昏錮蔽日入於禽獸而不自知任君師之責者奚忍不亟爲之申重而切諭之也我聖祖仁皇帝頒聖諭以教士民首崇孝悌皇考世宗憲皇帝衍爲廣訓往復周詳已無遺蘊但朔望宜講祇屬具文口耳傳述未能領會不知國家教人字字要人躬行實踐樸實做人倫日用正是聖賢學問至切要處堯舜之世比戶可封只是能盡孝悌放僻邪侈觸蹈法網只爲不知孝弟記曰將爲善思貽父母令名必果將爲不善思貽父母惡名必不果誠能如此存心豈復有縱欲妄行之事苟不從此處切實做起誦讀詩書高談性命直謂之不學可耳凡有牧民課士之責者隨時隨事切實訓誨有一事之近於孝弟則從而獎勵之有一事之近於不孝不弟則從而懲戒之平時則爲之開導遇事則爲之剖晰如此則親切而易入將見父詔兄勉日積月累天良勃發率其良知良能以充孝弟之實藹然有恩秩然有義豫順積於家庭太和翔於宇宙親遜成風必於此始凡吾赤子其敬聽諸凡厥司牧其敬率諸

## 原序

世祖章皇帝。本上天好生之心。廣善與人同之願。博採舊文。獨標新義。名曰勸善要言。而太上感應篇。乃在摘取中者也。冠以御製。照耀簡端。大哉王言。真若星漢經天。江河沛地矣。迨我皇上。繼統承庥。尊孔孟之書。闡六經之旨。纂通鑑。衍孝經。布告臣民。頒行中外。猗歟盛哉。仰見淵源聖學。先後一揆。大一代之同文之治。廣千古心法之傳。不惟海內黎元。戶誦詩書。家修孝弟。即日出月入之鄉。鳥音卉服之倫。莫不輸誠慕義。服教畏神。熙熙然。皞皞然。直與虞夏商周。共臻上理。而豈漢唐宋明。所可彷彿萬一者哉。余叨沐皇恩。兩撫滇境。一切農桑學校。無不諄諄勸勉。每逢朔望。督率僚屬。宜揚聖諭。並令守令等官。一體講解。雖數年以來。邊圉漸謐。風俗漸醇。而夙夜匪懈之心。余則何敢斯須或去也。甲戌夏五月。偶得太上感應篇圖說。翻閱數過。手不忍釋。其引經也。見訓典之足憑。其證史也。示法戒之可信。其徵事也。考往而知來。其繪圖也。因象而悟理。大而四端五典。紀綱法度。以至撝節愛養。勸靜語默。無不包舉而無遺。推暨而罔外。現幽明於尺楮。洩造化於毫端。其於世道人心。非小補也。余仰體皇仁。推廣聖化。特捐薄俸。刊序刷頒。惟願讀是篇者。觸目驚心。身體力行。毋曰彼蒼甚渺也。一事之公私。即爲天地所式臨。毋曰爾室可欺也。一念之邪正。即爲鬼神所指擿。但使日用倫常之際。爲臣者。竭忠盡於國。爲

子者。教孝敬於家。爲士者。守禮義於膠庠。爲民者。安耕鑿於閭井。化椎魯爲文明。變戈矛爲干羽。相與擊壤歌風。共嬉遊於萬年有道之朝。是余之志也夫。

康熙三十三年廣甯王繼文序

### 原序

我朝列聖相承。紹天建極。錫厥庶民。六合之內。八方之外。風德濡化。丕應宜治。罔不率俾夫上所好。民之表也。願教思無窮。則易所謂正辭。書所謂皇極之敷言。作君作師。有不能已。而人臣承流布澤。綴附古訓。稽參演繹。於以宣上德。廣教化。殆庶幾焉。欽惟世祖章皇帝。平定天下。安集羣生。邳治維新。務以德化。其時蒸庶懷仁。性類循理。喁喁如也。猶念遐邇殊地。運世異時。乃著爲勸善要言。命詞臣翻譯成帙。冠以睿藻序文。渙揚宇內。昭茲來許。臣郝玉麟嘗伏誦聖製。博覽約取。於太上感應篇採錄爲多。夫是篇蒼萃羣書。該括萬事。其指洪纖悉備。其辭顯蒙可曉。桴鼓影響之理。使人確然無疑。宋初李天錫表出於道藏爲之作傳。南宋鄭德源作讚。理宗嘗以禁錢百萬刊布。先儒真西山氏復序而行之。大聖闡揚。至教益顯。時雲南撫臣王繼文鏤板流傳。王言垂於前。感應篇圖說擊於後。展卷則尊信之心。披圖則從違意決。誠治教之一助也。迨至聖祖仁皇帝。世宗憲皇帝。暨我皇上。所以覺世牖民。緝熙紹徽。後先一揆。是以久於其道。而天下化成。臣玉麟自奉命。節制閩浙。仰承累朝正德厚生。一道同俗。

至意。凡農桑學校。諸事殫心。經畫數年來。綱紀幸已舉張。吏民亦安條教。願立政欲其勿壞。兼教要於振德。優而柔之。使自求之。厭而飭之。使自趣之。則撫臣王繼文。感應篇圖說。實足以勸覺人之心目。爰集善本。較讎增益。重付剞劂。以廣其傳。夫善惡感應。天之常也。苟爲善而不期報。民之上也。卽期報而爲善。民之中也。若知有報而不能爲善去惡。民之下也。而况以善爲不足爲。以惡爲不必去者乎。凡茲士庶。幸生重熙累洽之時。沐漸仁摩義之澤。欽聖主之格命。佩太上之明訓。觀淑慝之肖形。其尙增美釋回。益自修潔。臻於粹精。以答教育。以儲福祐也哉。

乾隆三年歲次戊午仲冬兵部尙書兼都察院右副都御史總督福建浙江等處地方軍務兼理糧餉世襲騎都尉加七級紀錄三十八次功加一等臣郝玉麟謹序

## 序

我世祖章皇帝。乘乾建極。統御萬邦。軫念下民。智慧不同。秉觀或有淺深。爰體彼蒼好生之心。廣善與人同之量。博採羣書。垂爲教法。名曰勸善要言。而於感應篇中。摘取尤多。親灑宸翰。焜耀簡端。至哉聖人之心。如天之無不覆。地之無不載。凡屬血氣之倫。固已展卷思興。聞風向化矣。迨至聖祖仁皇帝。世宗憲皇帝。暨我皇上。聖聖相承。心源合撰。凡所以覺世牖民者。時勤睿慮。疊沛恩綸。至德之感乎。淪肌

決髓扶杖而觀者。感激涕泣。咸仰聖天子推誠佈赤。超堯舜而邁百王。非漢唐宋明。粉飾虛文。可得彷彿其萬一也。正元海疆薄植。一介庸材。父子兄弟。世受國恩。愧乏嘉謨。稍稗聖治。竊念太上感應篇。統四端兼萬善。其指洪纖悉備。其辭淺近易明。現幽明於尺幅。洩造化於毫端。梓鼓影響之理。如是乎。確然其不爽也。蓋有所慕而後爲善。有所畏而後去不善者。民之情也。是篇引之以所慕。而惕之以所畏。俾善者益堅道念。不善者革其非心。洵足羽翼皇獻。贊勳聖化。其於世道人心。非小補也。因不揣固陋。學前賢之故步。纂輯成帙。冠以列聖天章。顏曰感應篇圖說。惟願世人口誦而心持。心持而身體。各念生聖人之世。由祖父以及子孫。百餘年來。休養生息。耳不聞兵甲之音。身不受饑寒之苦。偶遇偏災。動費帑金千萬。曠典異數。實爲千古所未聞。因感生奮。因奮生勵。倫常日用之間。爲臣者大法小廉。爲子者竭力盡志。爲士者執經於膠序。爲農者秉耒於田疇。以及婦人女子。亦守內則而凜閨箴。各安其位。各得其所。親睦成風。獄訟衰息。相與擊壤鼓腹。共享萬世太平之福。方克副太上傳經之心也夫。

乾隆二十年歲次乙亥仲冬浙江處州鎮總兵官黃正元敬識

### 舊序

古之出入將相。著偉績而膺繁祉者。非特才略茂也。必其仁心爲實。激勸懲警之意。有以覃被於天下。

而後有以感召乎彼蒼。蓋嘗論天人理數之間捷。若影響無毫髮爽。是故曷尚書聖人覺世牖民之書也。易言積善積惡。書言惠迪吉。從逆凶。一篇之中三致意焉。乃或者以感應之說。近於矯誣。且啓人僥倖。不知爲善而卽思獲福。改過而出於畏罪。誠非聖人之心。聳之以福。怵之以罪。以堅其爲善改過之念。則正聖人覺世牖民之善術也。故余嘗謂太上感應篇。與曷尚書相表裏。不可不心解而力行之者。節制處金開府黃公。歟。歷戎閩。垂四十年。戢兵綏民。功烈卓卓可紀。而利物濟人。如散藥療疾。捐資育嬰。諸善事。指不勝屈。生平篤信感應篇。一言一行無不奉爲模範。旣更欲公之同好。於是博採古今善惡之報。著爲論案。繪之圖像。繫以詩章。刊刻流布。猗歟休哉。蓋公之立心在乎覺世牖民。以爲廣徵博引。不啻六韜三略。三令五申也。論斷確鑿。不啻步伐止齊。刁斗森嚴也。繪之爲圖。不啻山川形勢。聚米畫沙也。紀之以詩。不啻採薇六月。詠歌見志也。然公之一生。所以罩被天下者。可於是書覘之。是以勳高望重。荷聖天子特達之知。鎖鑰之寄。而且康強逢吉。夢叶蘭熊。作善降祥。修德獲報。公之感召彼蒼者。亦卽於是書決之。感應篇可作曷尚書讀。則是書作曷尚書註解讀。奚不可哉。余忝師率之任。於公爲同城。竊喜是書流布。自括蒼始。俾所部士民。咸知心解力行。以之爲善而改過。卽以之錫福而免罪。是尤公之大有造於括也。用是不辭固陋。敬書數言於簡末。以見公之著偉績。而膺繁祉者。其來有自。

且以志余之私幸云。

乾隆二十年十月玉沙楊志道謹書

### 舊序

嘗曠觀於天人之理。其感應之機。至不爽也。天有四時。莫大於春。雖溫肅遞嬗。而太和之氣運而日新。人有四德。莫大於仁。雖寬嚴互施。而秉懿之真流而不息。天也人也。一而二二而一也。故人心之淑慝。其感甚微。其應甚速。一念之祥和。在人爲睟面盎背。在天則景星慶雲應之矣。一念之慘刻。在人爲疾聲戾色。在天則淒風苦雨應之矣。易傳謂積善之家。必有餘慶。積不善之家。必有餘殃。禹謨謂。惠迪吉。從逆凶。惟影響。皆昔之聖人洞達天人之旨。言雖互異。理固同揆也。括蒼總鎮大人黃公德宗性善。學究天人。公之太翁穎公大人。曾於趨庭之日。授以感應真言。世德淵源。其來已久。公自弱冠登鄉薦。成進士。第射策金門。侍衛殿陛。歷任西江巴蜀。自江南河協。陞任金處總鎮。數十年間。所閱雖殊。篤志好善。久而愈純。日以感應祕訓爲兢兢。居恆軍政稍暇。採輯古今事跡。足與經旨相發明者。配註作傳。至數千言。蓋本其平日身體力行。天人協應。歷歷不爽者。現身說法。欲使萬類同臻善域。普天咸躋休徵。以沐浴乎春風膏雨。鼓歌於光天化日者也。時有之。孝子不匱。永錫爾類。惟公有焉。乙亥春。輯其傳註。欲公同志。寄育點次付梓焉。事既竣。爰拜手爲之序。

宜陽舊令汾涓雷仁育敬書於蓮城山屋。

## 凡例

(一) 感應篇圖說。始於雲間許鶴沙先生。借印者則有梁公化風。繼刊者則有朱公作鼎。王公繼文。郝公玉麟。流傳海內。令天下智愚賢不肖。咸知福善禍淫。不爽毫髮。莫不惕然自省。洵濟世之寶筏也。但人心厭故喜新。或因數見不鮮。多有塵積案頭。久不寓目者。是編句必有註。註必有傳。復繪圖以肖其狀。仍師鶴沙先生故步。而所引事實。多採新聞。無非欲動閱者之目。興起其從善去惡之心。

(二) 感應篇舊本。多援引六經文。義深奧。執學淺者而強語之。必茫然不解。致生倦意。爰箋註列傳。辭皆淺顯。俾擔夫販豎。婦人女子。如聽稗官小說。靡不了然於心。一切深奧之語。概不載入。

(三) 感應篇有章節。有段落。有起伏。照應。自開端太上曰。至如影隨形。乃全篇之綱領。為第一章。天地有司過之神。至算盡則死。先言惡報以示警。為第二章。又有三台北斗。至先須避之。極言上天糾察之嚴。為第三章。是道則進。至三百善。備舉善行。使人知所勉。為第四章。苟或非義而動。至殃及子孫。備舉惡行。使人知所畏。為第五章。又諸橫取。至死亦及之。三致叮嚀告戒。為第六章。心起於善。至轉禍為福。發明形影之喻。反覆咏嘆。為第七章。吉人語善。至末。總結善惡之報。與首節相應。為第八章。此全篇

之大旨也。

(四) 經文惡行章。一句自爲一事。望之雖若瀰漫。其中自有條理。如苟或非義。至狠戾自用。指悖逆大惡。是非不當。至見殺加怒。指仕宦之惡。知過不改。至侵凌道德。指士庶之惡。射飛逐走。至傷胎破卵。指殺生之惡。願人有失。至助人爲非。指柔惡。逞志作威。至縱暴殺傷。指剛惡。無故剪裁。至勞擾衆生。指不惜物力之惡。破人之家。至以窮人用。指顯橫之惡。見他榮貴。至願他身死。指隱藏之惡。干求不遂。至可稱而抑之。是有因而肆其惡。埋盡厭人。至好侵好奪。是無因而肆其惡。擄掠致富。至恐嚇於他。是得志之惡。怨天尤人。至鑑猥事。是無忌憚之惡。施與後悔。至謾慕愚人。是不仁恕之惡。貪婪無厭。至行多隱僻。是家庭之惡。晦臘歌舞。至殺龜打蛇。是不敬天地神明之惡。層次條理。是極分明。

(五) 篇中之句。有似同而實異者。如憫人之凶與逞惡句相似。一則指喪服。一則指惡人。誑諸無識與謾慕愚人相似。一則指西席欺誑東家。一則指使巧捉弄無知之人。殺人之財。與破人之家。取其財寶相似。一指權勢大惡。一指平常之人。蔽人之善與挫人所長相似。一兼指有位無位。一專指居官。乘威迫脅與逞志作威相似。一則圖其快己。尙無他意。一則以人命爲草菅。輕蔑天民與勢擾衆生相似。一指百姓。一指牲畜。侵其先生與恚怒師傅相似。一概指尊宿。一專指受業。包貯險心與心毒貌慈相

似。一則令人不測。一反令人可親。咒詛求直與自咒咒他相似。一是忿極求伸。一是撒潑無賴。各句實不相同。並無重複之句。

(六) 經文內有語似對舉意則申講者。亦有語似申講意則對舉者。舊本多以申講之句分爲兩事。以對舉之句合作一事。殊失經旨。涵泳上下文自見。此編或分或合。一一參以經旨。以期不背本意。

(七) 舊本徵事。多寥寥數語。茲編所載。或得諸傳聞。或得諸目擊。每事皆備記原委。悲歡離合。纖悉皆具。庶閱者得知始末。轉相傳述。

(八) 各本列傳。有一句援引數事者。有一句祇引一事者。更有此句之事彼句可以通用者。殊不盡一。茲編每句各採一事。俱於本句切合。不可移用他句。極爲醒目。

(九) 是編箋註。博採前人之說。其精當不易者。不敢稍有異議。間有語涉泛漫不合經旨者。則參以鄙見。總期折衷至當。非敢妄逞胸臆。

(十) 經文所載。善行善報。不過三十餘條。而善行惡報。則有一百六十餘條。是知功易積過難除也。持是經者。雖積善功。不先改過。則功不掩過。難得福報。

(十一) 世本前列靈驗記。彼此抄襲。雷同無二。觀者展卷。則曰予既已知之。遂置而不閱。茲編另採

新語。分爲八則。使海內諸君子。知造命者天。立命者我。各發虔心。各祈所得。斷無不其應如響者。

(十二) 經文大旨。雖合上下通勉。而爲居官箴誠者尤多。蓋人有官職。一言一事。關係匪輕。則爲功爲罪。亦匪輕。得福得禍。豈同於匹夫編戶之列。更宜猛省精進。拳拳服膺。

(十三) 各本徵事。有雖切合本文。而報應不詳者。或雖列報應。而不甚顯赫者。每令閱者有不全不備之憾。茲編新載善惡之報。大小分明。地獄天堂。不爽毫髮。於警世勵俗之道。不無一得。

(十四) 舊本止一註一圖。茲編圖後。或繫以詩。或繫以詞。或繫以古語。反覆叮嚀。如曲終更繞餘韻。雖云下里之音。或有當於矇眊之奏。

(十五) 經文雖出道藏。所言皆格致誠正之功。齊治均平之理。並無鼎鑪修煉之習。與四書六經相爲表裏。人能全而體之。則可希聖希天。得其緒餘。亦可謹身寡過。

(十六) 人當君稚之年。如甘未受和。白敢受采。此時聲善言。見善行。則能終身不忘。所以耄耋之人。其中年所記誦。杳不可憶。而幼時句讀。歷歷可舉。何也。因蒙養之時。心如止水。目之所先見。耳之所先入。習與性成。久而不遷。每見世之教子弟者。誦讀經書之外。間涉風雲月露之詞。竊以爲不若先取是編訓迪。雖文義淺顯。言詞樸直。而寓目警心。重稚易曉。可當小學之書。

# 太上感應篇

太上尊稱也。開章揭此二字。示人凜凜。不敢違悖之意。由此動彼謂之感。由彼答此謂爲應。言善惡受報。不爽釐毫也。

太上曰。禍福無門。惟人自召。善惡之報。如影隨形。是以天地有司過之神。依人所犯輕重。以奪人算。算減則貧耗。多逢憂患。人皆惡之。刑禍隨之。吉慶避之。惡星災之。算盡則死。又有三台北斗神君。在人頭上。錄人罪惡。奪其紀算。又有三尸神。在人身中。每到庚申日。輒上詣天曹。言人罪過。月晦之日。竈神亦然。凡人有過。大則奪紀。小則奪算。其過大小。有數百事。欲求長生者。先須避之。是道則進。非道則退。不履邪徑。不欺暗室。積德累功。慈心於物。忠孝友悌。正己化人。矜孤恤寡。敬老懷幼。昆蟲草木。猶不可傷。宜憫人之凶。樂人之善。濟人之急。救人之危。見人之得。如己之得。見人之失。如己之失。不彰人

短。不炫己長。遏惡揚善。推多取少。受辱不怨。受寵若驚。施恩不求報。與人不追悔。所謂善人。人皆敬之。天道佑之。福祿隨之。眾邪遠之。神靈衛之。所作必成。神仙可冀。欲為天仙者。當立一千三百善。欲求地仙者。當立三百善。苟或非義而動。背理而行。以惡為能。忍作殘害。陰賊良善。暗侮君親。慢其先生。叛其所事。誑諸無識。謗諸同學。虛誣詐僞。攻訐宗親。剛強不仁。狠戾自用。是非不當。向背乖宜。虐下取功。諂上希旨。受恩不感。念怨不休。輕蔑天民。擾亂國政。賞及非義。刑及無辜。殺人取材。傾人取位。誅降戮服。貶正排賢。凌孤逼寡。棄法受賂。以直為曲。以曲為直。入輕為重。見殺加怒。知過不改。知善不為。自罪引他。壅塞方術。訛謗聖賢。侵凌道德。射飛逐走。發蟄驚棲。填穴覆巢。傷胎破卵。願人有失。毀人成功。危人自安。滅人自益。以惡易好。以私廢公。竊人之能。蔽人之善。形人之醜。訐人之私。耗人貨財。離人骨肉。侵人所愛。助人為非。逞志作威。辱人求勝。敗人苗稼。破人婚姻。苟富而驕。苟免無恥。認恩推過。嫁禍賣惡。沽買虛譽。包貯險心。挫人所長。護己所短。乘威迫脅。縱暴殺傷。無故